

NYUMBA YA HAKI YA ULIMWENGU
IDARA YA UANDISHI

1 Desemba 2019

Kwa Mabaraza yote ya Kiroho ya Kitaifa

Marafiki Wapendwa wa Kibahá'í,

Hali za kusumbua zinazowasibu watu wa ulimwengu na matatizo yachagizayo yanayosababishwa na mafarakano ndani na baina ya mataifa, kama mjuavyo, zimekuwa mada inayojitokeza sana katika ujumbe mwingi wa Nyumba ya Haki ya Ulimwengu. Wabahá'í, bila shaka, daima wamekuwa wazingatifu wa hali ya ulimwengu. Hali njema ya binadamu na amani yake na utulivu ni matanio yasiyobadilika ya wale wote ambao wamehifadhi moyoni nasihi ya Bahá'u'lláh “kuwa wenye dukuduku na mahitaji ya zama wanamoishi”. Zaidi, kwa kiasi kikubwa mno, ni dhahiri, kwamba shauku ya waumini kuchangia kwenye uboreshaji wa ulimwengu na kushiriki kimanufaa katika maisha ya jamii kwa vyo vyote vile hakukinzani na kutojikusisha kwao katika siasa. Wakati utambuzi wa taabu zinazowasibu wengi mno huimarisha kujidhatiti kwenye mabadiliko ya kimsingi ya jamii, kujikusisha kwa Wabahá'í katika shughuli za kisiasa kungesababisha tu kutapanya nguvu za jumuiya na kushindwa kuleta hayo mabadiliko. Lazima yaibuke kutokana na mabadiliko ya kiroho ya jamii. Mawazo haya yaliibuliwa na Nyumba ya Haki ya Ulimwengu kwa ukamilifu zaidi katika ujumbe wake wa 2 Machi 2013 kwa Wabahá'í wa Irán, ujumbe ambao jumuiya nyingi zimeuona wenye manufaa kuurejea wakati hadi wakati.

Tumeombwa tuwawasilishie baadhi ya vipengele vya nyongeza kwenye mada inayohusika kwa ukaribu sana, na barua hii mnaweza kupeana na marafiki kwa jinsi yoyote muionayo inafaa zaidi.

Moja ya dalili inayojitokeza wazi wazi ya unyonge unaoididimiza jamii ni mteremko wa kasi wa mijadala ya umma katika husuda na uadui mkubwa zaidi, ikiakisi mawazo mgando ya mitazamo ya kisiasa. Sura inayojitokeza zaidi ya mijadala kama hiyo ya siku hizi ni namna tofauti za kisiasa zinavyoporomoka kwa kasi katika shutuma na ubezaji. Walakini, kile kinachoitofautisha hasa zama za sasa kutoka zile zilizoitangulia ni jinsi gani kwa kiasi kikubwa mijadala hii inavyojitokeza katika muonekano mzima wa ulimwengu. Vyombo vya habari vya kijamii na vyombo vya habari vinavyohusiana huelekea kutoa mfichuo mkubwa kabisa kwa yote ambayo hukanganya, na vyombo hivyo hivyo huwaruhusu watu binafsi, katika muda mfupi, kusambaza kwa upana zaidi chochote kile kinachowafikia na kutoa mtazamo wao kuwa wanakubaliana au wanapingana na mawazo hayo iwe wazi wazi au kimya kimya. Urahisi usio na kifani ambao mtu anaweza kujiunga katika midahalo ya umma na asili ya teknolojia vyaweza kurahisisha zaidi maamuzi potofu ya ghafla na matendo ya bila kufikiri na athari zake hudumu zaidi.

Hii inakuwa na matokeo maalum kwa Wabahá'í, ambao wanajua vyema kwamba kanuni za Imani yao huwataka kuepukana na mabishano ya kisiasa na magomvi ya kila aina. “Usizungumze neno lolote la siasa” ilikuwa nasaha ya ‘Abdu'l-Bahá kwa muumini mmoja, akiongeza, “Isipokuwa ukiwazungumzia vizuri, usitaje wafalme wa kidunia, na serikali za

ulimwengu zilizomo.” Shoghi Effendi alionya dhidi ya kuruhusu muono wetu wa Hoja kuzibwa “na madoa na vumbi la matukio ya kiulimwengu, ambayo, hata yawe yang’ aayo na makubwa jinsi gani katika athari zake za papo hapo, ni vivuli vipitavyo tu vya ulimwengu usio mkamilifu“. Wakati umuhimu wa kujiweka kando na masuala yote ya uchochezi wa kisiasa unajulikana vyema kwa marafiki, kujihusisha kwao na masuala yanayoshinikiza ya kijamii, kukihamasishwa na shauku njema na za dhati za kuwa wenye huduma kwa wale wawazungukao, kunaweza kuwaletea mazingira magumu. Matokeo yasiyotarajiwa yanaweza kugeuza masuala yasiyobishaniwa kuwa yale ambayo huwagawa watu katika misingi ya vyama vya kisiasa, na baadhi ya namna zisizofaa za kujieleza ambazo ni za kawaida katika nyanja za kisiasa zaweza kuhamia katika maeneo mengine ya mijadala. Hasa katika maeneo yasizo na vizuizi ya vyombo vya habari vya kijamii, upotoshaji—vyote viwili, halisi na wa kuwazika—unakuzwa kwa haraka, na hisia tofauti tofauti huchochewa kirahisi: pengine kuadhirika au tamaa ya kukuza wazo la mtu binafsi au shauku ya kujionyesha kama chanzo cha habari mpya. Kubwa kwamba huchukuliwa kuwa halina madhara au hata lililodhamiriwa vyema, likiangaliwa kwa ukaribu zaidi, unachangia kuimarisha migawanyiko ya kijamii, kuchochea tofauti baina ya makundi pinzani na kuendeleza mafarakano, kusukumia mbali uwezekano kwa ajili ya maridhiano na utafutwaji wa suluhu. Ikiwa mchango wa mtu mmoja huonekana wa kichokozi au kipinzani, kuujibu kunaweza kuwa na matokeo ya kuuimarisha bila kujua na kuongeza mfichuo wa wazo la mwanzoni, na kukuza mambo. Wafuasi wa Uzuri Uliobarikiwa lazima wawe watumiaji makini na waangalifu wa teknolojia yoyote wanayoamua kuitumia na lazima watumie umaizi na nidhamu ya kiroho. Wanapaswa waangalie kwenye viwango vya juu vya Hoja kuwaongoza wakati wote kwa namna wanavyojieleza. Bahá’u’lláh husema:

Kila neno limejaaliwa roho, kwa hiyo mzungumzaji au muelezaji lazima awasilishe maneno yake kwa uangalifu kwa wakati na mahali panapofaa, kwani picha inayofanywa na kila neno ni dhahiri shahiri na huonekana. Aliye Mkuu husema: "neno moja linaweza kufananishwa na moto, lingine na mwanga na matokeo ambayo vyote viwili hutoa hudhihirika ulimwenguni."

Itakuwa dhahiri kwamba miongozo wanayoifuata marafiki wakati wa maingiliano yao ya jumla na wale wanaowazunguka lazima pia ibainishe, wakati mwingine hata kwa hadhari zaidi, mawasiliano yao wanayoyafanya kupitia vyombo vya habari vya kijamii. Miongozo hii ni pamoja na katazo la usengenyaaji, ushauri wa kuuona ulimwengu kwa macho yao wenyewe na siyo kwa macho ya wengine, haja ya kudumisha umoja wa jamii ya binadamu na kujiepusha na mtazamo wa “sisi” na “wao”, na kanuni za ushauriano na staha ya lazima ihusianayo nayo.

Marafiki mara chache chache watakutana na mazingira ambapo waumini wenzao wametoa maoni au kueneza maoni ya wengine kwa namna ambayo huonekana hsiyo busara au ya kijinga, wakati yanapoangaliwa dhidi ya viwango vilivyowekwa katika Maandiko ya Kibahá’í. Ingekuwa kosa, tunapokutana na habari za aina hii, kuhitimisha kwamba tabia kama hiyo lazima kwa hiyo isipingwe, kupuuzwa au hata kuhamasishwa. Mara kwa mara, asasi za Kibahá’í zililazimika kuwashauri watu binafsi kuhusiana na vitendo vyao mitandaoni, ingawa pale ilipowezekana wafanye hivyo kwa busara, wakiheshimu utu wa watu wahusikao.

Mfano mmojawapo miongoni mwa maeneo mengi ambayo mazingatio yaliyoonyeshwa hapo juu huhusika ni mjadala wa vyombo vya habari vya kijamii juu ya masuala yanayoihusu Irán. Kama itakavyofahamika bila shida, hili ni eneo la unyeti maalum, na kwa hiyo marafiki wanahitaji kuwa kwenye ulinzi wao hasa. Kauli za pupa zifanywazo mitandaoni zingewahatarisha waumini katika

ardhi hiyo au kuwapa maadui wa Hoja njia za kuwachafua Wabahá'í bila kujua. Kufuata tahadhari kali kuhusiana na jambo hili ni muhimu sana kwa ajili ya ulinzi wa jumuiya yenye sononi (huzuni) iliyojaribiwa ya huko Irán.

Kuhusiana na hili, Nyumba ya Haki imetuomba tuwasilishe jambo la nyongeza kwa waumini wa Uajemi ambao wanaishi nje ya Chimbuko la Imani. Inaeleweka vyema kwamba marafiki hawa wanahisi shauku binafsi kali kwa ajili ya ustawi wa Wabahá'í wenzao wa huko Irán na kwa ajili ya hali ya siku zijazo ya ardhi hiyo takatifu. Hata hivyo, wanaaswa kuzingatia kwamba, bila kujali ardhi yao ya asili, wajibu wao wa kimsingi unapaswa uwe kwenye maendeleo ya Imani katika nchi ambamo kwa sasa wanaishi. Kwa kweli, katika kipindi cha historia ya Imani, michango iliyotolewa na Wabahá'í wa Uajemi kwenye kazi ya ufundishaji katika kila bara ni mingi mno kuihesabu, na Nyumba ya Haki hufurahi wakati marafiki hawa wanapoelekeza jitihada zao kwenye uendelezaji wa Mpango wa Miaka Mitano katika maeneo wanakoishi. Hili ndilo linapaswa liwe lengo lao kuu; kupania kutimiza lengo kama hilo ndiyo kutaleta shangwe kwa kaka na dada zao wa kiroho wa huko Irán na kuenzi istahilivyo dhabihu zinazotolewa na watumishi hao thabiti.

Pamoja na salamu za upendo wa Kibahá'í,

Idara ya Uandishi

Nakala:

Kituo cha Ufundishaji cha Kimataifa

Bodi za Washauri wa Bara